

ամէն հին եկեղեցեաց վերայ կ'երևի, այժմ միայն դադրած է ոմանց եկեղեցեաց մէջ, Ռուսաստանի մի քանի քաղաքներուն, որ կամայականութիւն է, և ոչ ըստ ազգային արարողութեան:

Ս. ՀՐԵՇՏԱԿԱՊԵՏՔ

Այժմ Ս. Հրեշտակապետք համարուած է գլխաւոր կամ մայր եկեղեցի. որ թէպէտ Ս. Սարգսի նման քաղաքիս կեդրոնական տեղին շինուած չէ, այլ որովհետև աւելի ընդարձակ է և կաթուղիկէիւ և բարձրաբերձ կամարներով յօրինուած, և վերջին քանի մի տասնեակ տարիներու մէջ կիսաւեր վիճակ ունէր Ս. Սարգիս, բնականաբար Ս. Հրեշտակապետաց անցած է մայր եկեղեցի լինելու պատիւը, որ հնութեամբ շատ հին չէնք մը չէ, ինչպէս կը վկայէ քարաքանդակ արձանագրութիւնն:

Շինուած է եկեղեցիս հարաւ արդեամբք Աստուածատրոյ ուրումն և նորա ընտանեաց ի ՊԾԷ (1408), կաֆայի արևմտեան կողմը բարձր դիրքի վերայ դրսի կողմէն բոլորովին անպսճոյճ. ունի հայկական կաթուղիկէ օսկէզօծ խաչիւ պսակուած, այլ խաչին ձեւը ազգային չէ. և համեմատութեամբ կաթուղիկէն խոշոր է, կը յիշեցընէ տիրող ազգային ճաշակը, մինչ մի փոքրածե խաչ թերևս աւելի համեմատ և վայելուչ կը լինէր ի ծայր կաթուղիկէին Հրեշտակապետաց: Եկեղեցւոյն ներսի կողմը վայելուչ է և դեղեցիկ, բարձրաբերձ և համեմատաշափ կամարներով, որոց վերայ կը հանգչի կաթուղիկէն: Վայելչագեղ են և բոլորովին հայկական խորանները, բեմը և դասը. ժողովրդոց կամ կանանց կողմը զատ շինուած է ցած երդիքով,